


**“ТАСДИҚЛАНГАН”**  
Ўзбекистон Республикаси Давлат  
активларини бошқариш агентлигининг  
2020 йил “20” августдаги 167к-ЛС-сон  
буйруғи билан



**Акциядорлик жамияти шаклидаги  
«UzAssets» АЖ**

**УСТАВИ**

Тошкент – 2020й.

## I. УМУМИЙ ҚОИДАЛАР

1.1. Ушбу устав Ўзбекистон Республикасининг “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонуни ва Ўзбекистон Республикаси Вазирлар Маҳкамасининг 2020 йил 15 июндаги “Хусусийлаштириш жараёнларини такомиллаштириш бўйича қўшимча чора-тадбирлар тўғрисида”ги 381-сон қарори асосида ишлаб чиқилган.

1.2. Акциядорлик жамияти шаклидаги «UzAssets» инвестиция компанияси (кейинги ўринларда - «UzAssets» АЖ) Ўзбекистон Республикаси Вазирлар Маҳкамасининг 2020 йил 15 июндаги “Хусусийлаштириш жараёнларини такомиллаштириш бўйича қўшимча чора-тадбирлар тўғрисида”ги 381-сон қарори ва «UzAssets» АЖ ягона таъсисчиси Ўзбекистон Республикаси Давлат активларини бошқариш агентлигининг 2020 йил “\_\_\_” июлдаги \_\_\_-сонли буйруғига асосан ташкил этилган.

1.3. «UzAssets» АЖ ўз фаолиятини Ўзбекистон Республикасининг “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонуни ва бошқа Ўзбекистон Республикасининг меъёрий ҳуқуқий ҳужжатларга мувофиқ олиб боради.

1.4. Жамиятнинг тўлиқ фирма номи:

давлат тилида:

лотин ёзувида - Aksiyadorlik jamiyati shaklidagi «UzAssets» investitsiya kompaniyasi;

кирилл ёзувида - Акциядорлик жамияти шаклидаги «UzAssets» инвестиция компанияси;

рус тилида: - Инвестиционная компания «UzAssets» в форме акционерного общества;

инглиз тилида: «UzAssets» joint-stock investment company.

жамиятнинг қисқартирилган номи:

давлат тилида:

лотин ёзувида - «UzAssets» AJ;

кирилл ёзувида - «UzAssets».

рус тилида: - АО «UzAssets»;

инглиз тилида: «UzAssets» JSC.

1.6. «UzAssets» АЖ давлат рўйхатидан ўтказилган пайтдан эътиборан юридик шахс мақомига эга бўлади. «UzAssets» АЖ чекланмаган муддатга тузилади.

1.7. «UzAssets» АЖ юридик шахс бўлиб, у ўз мустақил балансида ҳисобга олинган алоҳида мол-мулкка, шу жумладан ўзининг устав фондида (устав капиталига) берилган мол-мулкка эга бўлади, ўз номидан мулкий ва шахсий номулкий ҳуқуқларни олиши ҳамда амалга ошириши, зиммасига мажбуриятлар олиши, судда даъвогар ва жавобгар бўлиши мумкин.

1.8. «UzAssets» АЖ ўзининг фирма номи давлат ва инглиз тилларида тўлиқ ёзилган ҳамда жойлашган ери кўрсатилган юмалок муҳрга эга бўлади.

«UzAssets» АЖ ўзининг номи ёзилган штамп ва бланкаларга, ўз тимсолига, шунингдек белгиланган тартибда рўйхатдан ўтказилган товар белгисига ҳамда фуқаролик муомаласи иштирокчиларининг, товарларнинг, ишларнинг ва хизматларнинг хусусий аломатларини ақс эттирувчи бошқа воситаларга эга бўлишга ҳақли.

1.9. «UzAssets» АЖнинг жойлашган ери у давлат рўйхатидан ўтказилган жойга кўра белгиланади.

«UzAssets» АЖнинг жойлашган ери (почта манзили): Ўзбекистон Республикаси, Тошкент шаҳри, Амир Темур кўчаси, 6-уй. Индекс: 100000

«UzAssets» АЖнинг электрон почта манзили: info@uzassets.uz;

«UzAssets» АЖнинг расмий веб-сайти: uz-assets.uz

«UzAssets» АЖ ўзининг жойлашган ери (почта манзили) ва электрон почта манзили ўзгарганлиги тўғрисида юридик шахсларни давлат рўйхатидан ўтказувчи органларни ёзма билдириш юбориш йўли билан, акциядорларни эса оммавий ахборот воситаларида эълон бериш йўли билан хабардор этиши шарт.

1.10. «UzAssets» АЖ Ўзбекистон Республикаси ҳудудида ва унинг ташқарисида белгиланган тартибда банк ҳисобварақларини очишга ҳақли.

1.11. «UzAssets» АЖ ўз мажбуриятлари юзасидан ўзига тегишли барча мол-мулк билан жавобгар бўлади.

Акциядорлар «UzAssets» АЖнинг мажбуриятлари юзасидан жавобгар бўлмайди ва унинг фаолияти билан боғлиқ зарарларнинг ўрнини ўзларига тегишли акциялар қиймати доирасида қоплаш таваккалчилигини ўз зиммасига олади.

Акцияларнинг ҳақини тўлиқ тўламаган акциядорлар «UzAssets» АЖнинг мажбуриятлари юзасидан ўзларига тегишли акциялар қийматининг тўланмаган қисми доирасида солидар жавобгар бўлади.

«UzAssets» АЖ ўз акциядорларининг мажбуриятлари юзасидан жавобгар бўлмайди.

Давлат ва унинг органлари «UzAssets» АЖнинг мажбуриятлари юзасидан жавобгар бўлмайди, худди шунингдек «UzAssets» АЖ ҳам давлат ва унинг органларининг мажбуриятлари юзасидан жавобгар бўлмайди.

1.12. «UzAssets» АЖ филиаллар ташкил этишга ва ваколатхоналар очишга ҳақли.

1.13. «UzAssets» АЖнинг филиали ва ваколатхонаси юридик шахс бўлмайди. Улар «UzAssets» АЖнинг кузатув кенгаши томонидан тасдиқланган низом асосида иш юритади. «UzAssets» АЖнинг филиалга ва ваколатхонага бериб қўйилган мол-мулки «UzAssets» АЖнинг балансида ҳисобга олинади.

Филиалнинг ёки ваколатхонанинг раҳбари «UzAssets» АЖ томонидан тайинланади ва «UzAssets» АЖ томонидан берилган ишончнома асосида иш юритади.

Филиал ҳамда ваколатхона фаолияти учун жавобгарлик «UzAssets» АЖ зиммасида бўлади.

«UzAssets» АЖ томонидан Ўзбекистон Республикасидан ташқарида филиаллар ташкил этиш ва ваколатхоналар очиш, агар Ўзбекистон Республикасининг халқаро шартномасида бошқача қоида назарда тутилмаган бўлса, филиаллар ва ваколатхоналар жойлашган ердаги мамлакатнинг қонун ҳужжатларига мувофиқ амалга оширилади.

1.14. «UzAssets» АЖ қонун ҳужжатларига мувофиқ акциядорлик жамияти ёки масъулияти чекланган жамият шаклидаги шўъба ва тобе хўжалик жамиятларига эга бўлиши мумкин.

1.15. «UzAssets» АЖ корхоналар, ташкилотлар ва бошқа тижорат тузилмаларини ташкил этишда қонун ҳужжатларида белгиланган тартибда қатнашиш ҳуқуқига эга.

1.16. Ушбу устав билан тартибга солинмаган ҳуқуқий муносабатлар Ўзбекистон Республикаси бошқа қонун ҳужжатлари ва норматив-ҳуқуқий ҳужжатлар, шунингдек халқаро шартномалар ва келишувлар билан тартибга солинади.

## **II. «UzAssets» АЖ ФАОЛИЯТИНИНГ СОҲАСИ (АСОСИЙ ЙЎНАЛИШЛАРИ) ВА МАҚСАДИ**

2.1. «UzAssets» АЖ фаолиятининг асосий мақсади ўзига берилган корхоналарнинг акция пакетлари (улушлари)ни сотиш учун уларни сотишдан олдин тайёрлаш ва

инвестициявий жозибадорлигини ошириш, мазкур улушларни салоҳиятли инвесторларга сотиш орқали хусусийлаштиришнинг муваффақиятли натижаларини таъминлаш, шунингдек акциядорларнинг манфаатлари йўлида фойда (даромад) олишдир.

## 2.2. «UzAssets» АЖнинг асосий вазифалари қуйидагилардир:

давлат акция пакети (улуши) устав капиталига берилган корхоналарни (кейинги ўринларда – корхоналар) сотишдан олдин тайёрлаш, шу жумладан уларнинг инвестициявий жозибадорлигини ошириш, бу борада самарали механизмларни жорий этиш бўйича хорижий, халқаро институтлар ва компаниялар билан самарали ҳамкорликни ташкил этиш;

корхоналар фаолиятини комплекс таҳлил қилиш (due diligence) жумладан инвестициявий таҳлил қилиш, “бенчмаркинг” усулида таққослаш орқали ривожланиш прогноз кўрсаткичларини белгилаш;

корхоналарнинг даромадлилиқ нормасини халқаро амалиётдаги мезонлар асосида таҳлил қилиш;

устав капиталига берилган акция пакетларини (улушларини) самарали бошқариш, корхоналарни ички ва ташқи бозорларда рақобатбардош корхоналарга айланишини кўзда тутган ҳолда уларни сотишга тайёрлаш ва сотиш жараёнларини режалаштириш;

салоҳиятли инвесторларнинг рўйхатини (short-list) шакллантириш мақсадида корхоналарни сотишда инвестиция воситачилари ва консултантларни жалб этишни кенг йўлга қўйиш;

истикболли корхоналарни сотиш бўйича “Road Show” дастурларини ишлаб чиқиш ва мақсадли аудиториялар учун тақдимотлар ўтказиб борилишини ташкил этиш;

иқтисодиёт тармоқларини узоқ муддатли ривожлантириш мақсадларидан келиб чиқиб, устав капиталига берилган активларни салоҳиятли инвесторларга сотиш орқали барқарор ва узоқ муддатли инвестициялар жалб этилишини таъминлаш.

2.3. Махсус рухсатнома (лицензия) олишни талаб қиладиган фаолият турлари қонунчиликда ўрнатилган тартибда, рухсатнома (лицензия) олингандан кейин амалга оширилади.

2.4. «UzAssets» АЖ, қўшимча фойда олиш мақсадида Ўзбекистон Республикасининг амалдаги қонунчилигида таъқиқланмаган бошқа фаолият турлари билан шуғулланишга ҳақлидир.

## III. «UzAssets» АЖ УСТАВ ФОНДИНИНГ МИҚДОРИ

3.1. «UzAssets» АЖнинг устав фонди акциядорлар олган жамият акцияларининг номинал қийматидан ташкил топади ва Ўзбекистон Республикасининг миллий валютасида ифодаланади.

3.2. «UzAssets» АЖнинг устав фонди **20 000 000 000** (йигирма миллиард) сўмни ташкил қилиб, ҳар бир акциянинг номинал қиймати 1 000 (бир минг) сўм бўлган **20 000 000** (йигирма миллион) дона эгасининг номи ёзилган оддий акцияга бўлинган.

3.3. «UzAssets» АЖнинг устав фонди жамият мол-мулкнинг жамият кредиторлари манфаатларини кафолатлайдиган энг кам миқдорини белгилайди.

3.4. «UzAssets» АЖ **5 000 000 000 000 000** (беш триллион) сўм миқдорида **5 000 000 000 000** (беш миллиард) дона номинал қиймати 1 000 (бир минг) сўм бўлган қўшимча эълон қилинган эгасининг номи ёзилган оддий акция чиқаришга ҳақли.

3.5. Акцияларга ҳақ тўлаш пул ва бошқа тўлов воситалари, мол-мулк, шунингдек пулда ифодаланадиган баҳога эга бўлган ҳуқуқлар (шу жумладан, мулкӣ ҳуқуқлар) орқали амалга оширилади.

#### **а) «UzAssets» АЖнинг устав фондини кўпайтириш**

3.6. «UzAssets» АЖнинг устав фонди акцияларнинг кўшимча акцияларни жойлаштириш йўли билан кўпайтирилиши мумкин.

3.7. Кўшимча акциялар эълон қилинган «UzAssets» АЖ уставида белгиланган акцияларнинг сони доирасидагина «UzAssets» АЖ томонидан жойлаштирилиши мумкин.

3.8. «UzAssets» АЖ устав фондини кўшимча акцияларни жойлаштириш йўли билан кўпайтириш тўғрисидаги ва «UzAssets» АЖ уставига тегишли ўзгартишлар киритиш ҳақидаги қарорлар Кузатув Кенгаши томонидан қабул қилинади.

3.9. «UzAssets» АЖ устав фондини кўшимча акцияларни жойлаштириш йўли билан кўпайтириш тўғрисидаги қарорда жойлаштириладиган кўшимча акцияларнинг сони, уларни жойлаштириш муддатлари ва шартлари белгиланган бўлиши керак.

3.10. «UzAssets» АЖ устав фондини кўшимча акцияларни жойлаштириш йўли билан кўпайтириш жалб қилинган инвестициялар, жамиятнинг ўз капитали ва ҳисобланган дивидендлар ҳисобидан қонун ҳужжатларида белгиланган тартибда амалга оширилиши мумкин.

«UzAssets» АЖ устав фондини унинг ўз капитали ҳисобидан кўшимча акцияларни жойлаштириш йўли билан кўпайтиришда бу акциялар барча акциядорлар ўртасида тақсимланади.

Бунда ҳар бир акциядорга қайси турдаги акциялар тегишли бўлса, айти ўша турдаги акциялар унга тегишли акциялар сонига мутаносиб равишда тақсимланади. «UzAssets» АЖ устав фондини унинг ўз капитали ҳисобидан кўпайтирилиши натижасида кўпайтириш суммасининг битта акциянинг номинал қийматига мувофиқлиги таъминланмайдиган бўлса, «UzAssets» АЖ устав фондини кўпайтиришга йўл қўйилмайди.

3.11. «UzAssets» АЖ устав фондини кўшимча акцияларни жойлаштириш йўли билан кўпайтириш жойлаштирилган кўшимча акцияларнинг номинал қиймати миқдоридан рўйхатдан ўтказилади. Бунда мазкур уставда кўрсатилган эълон қилинган кўшимча акцияларнинг сони жойлаштирилган кўшимча акцияларнинг сонига қисқартирилиши керак.

3.12. «UzAssets» АЖ акциядорларининг умумий йиғилиши томонидан қабул қилинган кўшимча акцияларни чиқариш тўғрисидаги қарор «UzAssets» АЖ устав фондини кўпайтириш тўғрисидаги қарордир.

#### **б) «UzAssets» АЖнинг устав фондини камайтириш**

3.13. «UzAssets» АЖ устав фонди акцияларнинг номинал қийматини камайтириш ёки акцияларнинг умумий сонини қисқартириш йўли билан, шу жумладан акцияларнинг бир қисмини кейинчалик бекор қилган ҳолда «UzAssets» АЖ томонидан акцияларни олиш йўли билан камайтирилиши мумкин.

«UzAssets» АЖ устав фондини акцияларнинг бир қисмини олиш ва бекор қилиш йўли билан камайтиришга ҳақли.

3.14. «UzAssets» АЖ устав фондини камайтириш тўғрисидаги ва «UzAssets» АЖ уставига тегишли ўзгартиришлар киритиш ҳақидаги қарорлар акциядорларнинг умумий йиғилиши томонидан қабул қилинади.

3.15. «UzAssets» АЖ устав фондини камайтириш тўғрисида қарор қабул қилинаётганда акциядорларнинг умумий йиғилиши устав фондини камайтириш сабабларини кўрсатади ва уни камайтириш тартибини белгилайди.

3.16. «UzAssets» АЖ устав фондини камайтириш тўғрисида қарор қабул қилинган санадан эътиборан ўттиз кундан кечиктирмай ўз кредиторларини бу ҳақда ёзма шаклда хабардор қилади.

Кредиторлар «UzAssets» АЖ устав фондини камайтириш тўғрисида ўзларига билдириш юборилган санадан эътиборан ўттиз кундан кечиктирмай «UzAssets» АЖдан ўз мажбуриятларини муддатидан олдин бажаришини ва устав фонди камайтирилиши билан боғлиқ зарарларнинг ўрнини қоплашини талаб қилишга ҳақли.

#### **IV. «UzAssets» АЖ АКЦИЯЛАРИНИНГ ТУРЛАРИ, УЛАРНИНГ НОМИНАЛ ҚИЙМАТИ, «UzAssets» АЖ НИНГ БОШҚА ҚИММАТЛИ ҚОҒОЗЛАРИ**

4.1. Жамиятнинг акциялари оддий эгасининг номи ёзилган эмиссиявий қимматли қоғозлар ҳисобланади. Ҳар бир акциянинг номинал қиймати 1000 (бир минг) сўм.

Оддий акцияларнинг эгалари бўлган акциядорлар қонунчилик ва ушбу уставга мувофиқ акциядорларнинг умумий йиғилишида мазкур йиғилиш ваколатига кирадиган барча масалалар бўйича овоз бериш ҳуқуқи билан иштирок этиши мумкин, шунингдек дивидендлар олиш, жамият тугатилган тақдирда эса, ўзларига тегишли улушга мувофиқ жамият мол-мулкининг бир қисмини олиш ҳуқуқига эга.

4.2. Жамиятнинг оддий акцияларини имтиёзли акцияларга, корпоратив облигацияларга ва бошқа қимматли қоғозларга айирбошлашга йўл қўйилмайди.

4.3. Жамият қонун ҳужжатларида назарда тутилган корпоратив облигациялар ва бошқа қимматли қоғозларни чиқаришга ҳамда жойлаштиришга ҳақли.

Жамият томонидан корпоратив облигацияларни чиқариш, шу жумладан акцияларга айирбошланадиган корпоратив облигацияларни чиқариш жамият кузатув кенгаши қарорига кўра амалга оширилади.

Жамият томонидан акцияларга айирбошланадиган корпоратив облигациялар чиқарилган тақдирда, мазкур қарор жамият кузатув кенгашининг барча аъзолари томонидан бир овоздан қабул қилиниши керак.

Акцияларга айирбошланадиган қимматли қоғозлар жамият томонидан жойлаштирилган тақдирда эълон қилинган акцияларнинг сони ушбу қимматли қоғозларнинг муомалада бўлиши муддати мобайнида айирбошлаш учун зарур миқдордан кам бўлмаслиги лозим.

Жамият ўзи жойлаштирган қимматли қоғозлар айирбошланиши мумкин бўлган акциялар берадиган ҳуқуқларни чеклаш ҳақида ушбу қимматли қоғозлар эгаларининг розилигисиз қарор қабул қилишга ҳақли эмас.

#### **V. ЖАМИЯТ АКЦИЯЛАРИНИ ЖОЙЛАШТИРИШ ТАРТИБИ ВА ШАРТЛАРИ**

5.1. Жамият акцияларни ва акцияларга айирбошланадиган қимматли қоғозларни очик ва ёпиқ обуна воситасида жойлаштиришга ҳақли.

Акцияларнинг очик обунаси фақат қимматли қоғозларнинг биржа бозорида ва уюшган биржадан ташқари бозорда ўтказилади.

5.2. Жамият томонидан жамиятнинг қўшимча акцияларини ва бошқа эмиссиявий қимматли қоғозларини жойлаштириш муддати уларнинг чиқарилиши давлат рўйхатидан

ўтказилган пайтдан эътиборан бир йилдан ошмаслиги керак. Жамиятнинг қўшимча акцияларига ушбу акцияларни чиқариш тўғрисидаги қарорда кўрсатилган жойлаштириш муддати ичида ҳақ тўланиши лозим.

5.3. Жамиятнинг қўшимча акцияларини ва бошқа қимматли қоғозларини жойлаштириш чоғида уларга ҳақ тўлаш пул ва бошқа тўлов воситалари, акция пакети (улуш), мол-мулк, шунингдек пулда ифодаланадиган баҳога эга бўлган ҳуқуқлар (шу жумладан мулкӣ ҳуқуқлар) орқали амалга оширилади. Қўшимча акциялар ва бошқа қимматли қоғозларга ҳақ тўлаш тартиби уларни чиқариш тўғрисидаги қарорда белгилаб қўйилади.

5.4. Қўшимча акцияларни жойлаштириш, шу жумладан акциядорлар ўртасида жойлаштириш тўғрисида қарор қабул қилишда акцияларни жойлаштириш (қимматли қоғозларнинг биржа бозорига ва уюшган биржадан ташқари бозорига чиқариш) нархи жамият акциядорларининг умумий йиғилиши томонидан қимматли қоғозлар савдоси ташкилотчиларининг савдо майдончаларида вужудга келаётган нархлар конъюнктурасидан келиб чиққан ҳолда белгиланади.

Жамиятнинг қўшимча акциялари ва бошқа қимматли қоғозларини жойлаштириш чоғида уларга ҳақ тўлаш уларни чиқариш тўғрисидаги қарорда белгиланганидан кам бўлмаган нарх бўйича амалга оширилади.

Жамиятнинг устав фонди кўпайтирилаётганда жамиятнинг қўшимча акцияларига унинг ўз капитали ҳисобидан, шунингдек ҳақини қўшимча акциялар билан тўлаш тўғрисида қарор қабул қилинган дивидендлар ҳисобидан ҳақ тўланган тақдирда, бундай акцияларни жойлаштириш жамият акцияларининг номинал қиймати бўйича амалга оширилади.

## **VI. ЖАМИЯТ АКЦИЯДОРЛАРИНИНГ ҲУҚУҚ ВА МАЖБУРИЯТЛАРИ**

### **6.1. Жамият акциядорлари:**

Жамият акциядорларининг реестрига киритилиш;

депо ҳисобварағидан ўзига тааллуқли кўчирма олиш;

Жамият фойдасининг бир қисмини дивидендлар тарзида олиш;

Жамият тугатилган тақдирда ўзларига тегишли улушга мувофиқ мол-мулкнинг бир қисмини олиш;

Акциядорларнинг умумий йиғилишларида овоз бериш орқали жамиятни бошқаришда иштирок этиш;

Жамиятнинг молия-хўжалик фаолияти натижалари тўғрисида тўлиқ ва ишончли ахборотни белгиланган тартибда олиш;

олинган дивидендини эркин тасарруф этиш;

қимматли қоғозлар бозорини тартибга солиш бўйича ваколатли давлат органида, шунингдек судда ўз ҳуқуқларини ҳимоя қилиш;

ўзига етказилган зарарнинг ўрнини қопланишини белгиланган тартибда талаб қилиш;

ўз манфаатларини ифодалаш ва ҳимоя қилиш мақсадида уюшмаларга ва бошқа нодавлат ноижорат ташкилотларга бирлашиш;

қимматли қоғозларни олишда зарар кўриш, шу жумладан бой берилган фойда эҳтимоли билан боғлиқ таваккалчиликларни суғурта қилиш;

Акциядорлар конун хужжатларига мувофиқ бошқа ҳуқуқларга ҳам эга бўлиши мумкин.

6.2. Акциядорлар конун хужжатларида белгиланган тартибда ва кўзда тутилган ҳолларда ўзларига тегишли акцияларнинг ҳаммаси ёки бир қисми жамият томонидан қайтариб сотиб олинишини талаб қилишга ҳақли.

6.3. Ҳар бир оддий акция унга эгаллик қилувчи ҳар бир акциядорга шу турдаги акцияларнинг бошқа эгалари билан бир хил бўлган ҳажмдаги ҳуқуқларни беради.

6.4. Акциядорнинг акциядорлар умумий йиғилишида иштирок этиши, дивидендлар олиши ва жамият томонидан корпоратив ҳаракатлар бажарилганда конун хужжатларида назарда тутилган бошқа ҳуқуқларни амалга ошириши жамият акциядорларининг реестри асосида амалга оширилади.

6.5. Акциядор томонидан ҳуқуқларнинг амалга оширилиши бошқа акциядорларнинг ҳуқуқлари ва конун билан кўрикланадиган манфаатларини бузмаслиги лозим.

Акцияларни бошқа шахсга беришга доир чеклов белгиланиши акциядорни - мазкур акциялар эгасини конунчиликда белгиланган тартибда жамиятни бошқаришда иштирок этиш ва улар бўйича дивидендлар олиш ҳуқуқидан маҳрум қилмайди.

6.6. Жамият акциядорлари қуйидаги мажбуриятларга эга:

жамиятнинг акцияларига конун хужжатларида, ушбу уставда ва акция чиқарилиши тўғрисидаги қарорларда кўзда тутилган тартибда, усулларда ва муддатларда ҳақ тўлаш;

жамият фаолияти тўғрисидаги махфий маълумотларни ошкор қилмаслик;

Акциядорлар конун хужжатларида назарда тутилган бошқа мажбуриятларга ҳам эга бўлиши мумкин.

6.7. Акцияларга бўлган ҳуқуқлар акцияларни олувчига унинг депо ҳисобварағига тегишли кирим ёзуви белгиланган тартибда киритилган пайтдан эътиборан ўтади ва конун хужжатларида белгиланган тартибда депо ҳисобварағидан кўчирма билан тасдикланади.

Акция билан тасдикланадиган ҳуқуқлар уларни олувчига ушбу қимматли қоғозга бўлган ҳуқуқлар ўтган пайтдан эътиборан ўтади.

## **VII. ДИВИДЕНДЛАРНИ ТЎЛАШ ТАРТИБИ**

7.1. Дивиденд жамият соф фойдасининг акциядорлар ўртасида тақсимланадиган қисмидир.

Жамият акцияларнинг ҳар бир тури бўйича эълон қилинган дивидендларни тўлаши шарт.

Дивиденд акциядорларнинг умумий йиғилиши қарорига кўра пул маблағлари ёки бошқа қонуний тўлов воситалари ёхуд жамиятнинг қимматли қоғозлари билан тўланиши мумкин.

Дивиденд акциядорлар ўртасида уларга тегишли акцияларнинг сони ва турига мутаносиб равишда тақсимланади.

7.2. Жамият молиявий йилнинг биринчи чораги, ярим йиллиги, тўққиз ойи натижаларига кўра ва (ёки) молиявий йил натижаларига кўра, жойлаштирилган акциялар бўйича дивидендлар тўлаш тўғрисида қарор қабул қилишга ҳақли.

7.3. Акциялар бўйича дивидендлар тўлаш, дивиденднинг миқдори, уни тўлаш шакли ва тартиби тўғрисидаги қарор жамият кузатув кенгашининг тавсияси, молиявий ҳисоботнинг ишончлилиги ҳақида аудиторлик хулосаси мавжуд бўлган тақдирда, молиявий



ҳисобот маълумотлари асосида акциядорларнинг умумий йиғилиши томонидан қабул қилинади. Дивидендларнинг миқдори жамият кузатув кенгаши томонидан тавсия этилган миқдордан кўп бўлиши мумкин эмас. Акциядорларнинг умумий йиғилиши акцияларнинг муайян турлари бўйича дивидендлар тўламаслик тўғрисида қарор қабул қилишга ҳақли. Дивидендлар тўлаш тўғрисидаги қарорда дивидендлар тўлаш бошланадиган ва тугайдиган саналар кўрсатилган бўлиши лозим.

7.4. Дивидендлар жамиятнинг жамият тасарруфида қоладиган соф фойдасидан ва (ёки) ўтган йилларнинг тақсимланмаган фойдасидан тўланади.

Дивидендлар тўлаш муддати ва тартиби жамият акциядорларининг умумий йиғилиши қароридан белгиланади. Дивидендлар тўлаш муддати шундай қарор қабул қилинган кундан эътиборан олти кундан кеч бўлмаслиги лозим.

7.5. Эгаси ёки эгасининг қонуний ҳуқуқий вориси ёхуд меросхўри томонидан уч йил ичида талаб қилиб олинмаган дивиденд акциядорларнинг умумий йиғилиши қарорига кўра жамият ихтиёрида қолади.

7.6. Акциядорларга дивидендларни тўлаш тўғрисида қарор қабул қилинган Акциядорларнинг умумий йиғилишини ўтказиш учун шакллантирилган жамият акциядорлари реестрида қайд этилган шахслар акциялар бўйича дивиденд олиш ҳуқуқига эга.

7.7. Жамият:

устав фондининг ҳаммаси у таъсис этилиши чоғида тўлиқ тўлаб бўлингунига қадар;

агар дивидендлар тўланадиган пайтда жамиятда банкротлик белгилари мавжуд бўлса ёки жамиятда шундай белгилар дивидендлар тўлаш натижасида пайдо бўлса;

агар жамият соф активларининг қиймати унинг устав фонди ва захира фонди суммасидан кам бўлса, акциялар бўйича дивидендлар тўлаш тўғрисида қарор қабул қилишга ҳамда дивидендлар тўлашга ҳақли эмас.

Ушбу бандда кўрсатилган ҳолатлар тугатилгач, жамият ҳисобланган дивидендларни акциядорларга тўлаши шарт.

7.8. Жамият дивидендларнинг миқдорини улардан ундириладиган солиқларни инобатга олмаган ҳолда эълон қилади. Жамият тўланадиган дивидендлар миқдори тўғрисидаги маълумотларни қонун ҳужжатларида белгиланган тартибда ва муддатларда эълон қилади.

## **VIII. ЖАМИЯТНИНГ ЗАХИРА ФОНДИНИ ВА БОШҚА ФОНДЛАРИНИ ТАШКИЛ ЭТИШ ТАРТИБИ**

8.1. Жамият соф фойда ҳисобидан устав фондининг 15 (ўн беш) фоизидан кам бўлмаган миқдорда захира фонди тузади. Жамиятнинг захира фонди ушбу уставда белгиланган миқдорга етгунига қадар соф фойданинг камида 5 (беш) фоизи миқдоридан ҳар йилги мажбурий ажратмалар орқали шакллантирилади.

8.2. Бошқа маблағлар мавжуд бўлмаган тақдирда, жамиятнинг захира фонди жамиятнинг зарарлари ўрнини қоплаш, жамиятнинг корпоратив облигацияларини муомаладан чиқариш ва жамиятнинг акцияларини қайтариб сотиб олиш учун мўлжалланади.

Жамиятнинг захира фондидан бошқа мақсадлар учун фойдаланиш мумкин эмас.

8.3. Жамият ташкил этиш мақсади, миқдори, ташкил этиш ва фойдаланиш тартиби акциядорларнинг умумий йиғилиши қарорига мувофиқ белгилаб бериладиган бошқа фондлар ташкил этиш ҳуқуқига эга.

## **IX. ЖАМИЯТ БОШҚАРУВИНИНГ ТУЗИЛМАСИ**

9.1. Жамиятни бошқариш органлари қуйидагилардан иборат:

акциядорларнинг умумий йиғилиши;

кузатув кенгаши;

ижроия органи (бошқарув).

## **X. ЖАМИЯТ АКЦИЯДОРЛАРИНИНГ УМУМИЙ ЙИҒИЛИШИ**

10.1. Акциядорларнинг умумий йиғилиши жамиятнинг юқори бошқарув органидир.

Акциядорларнинг умумий йиғилишини жамият кузатув кенгаши раиси, у узрли сабабларга кўра бўлмаган тақдирда эса, жамият кузатув кенгаши аъзоларидан бири олиб боради.

10.2. Жамият ҳар йили акциядорларнинг умумий йиғилишини (акциядорларнинг йиллик умумий йиғилишини) ўтказиши шарт.

Акциядорларнинг йиллик умумий йиғилиши молия йили тугаганидан кейин олти ойдан кечиктирмай ўтказилади.

Акциядорларнинг йиллик умумий йиғилишида жамиятнинг кузатув кенгашини ва тафтиш комиссиясини сайлаш тўғрисидаги, жамиятнинг бошқарув раиси ва аъзолари билан тузилган шартномаларнинг амал қилиш муддатини узайтириш (шартномани қайта тузиш ёки уни тугатиш (бекор қилиш) мумкинлиги тўғрисидаги, шунингдек жамиятнинг йиллик ҳисоботи, жамият ижроия органи ва кузатув кенгашининг жамиятни ривожлантириш стратегиясига эришиш бўйича кўрилаётган чора-тадбирлар тўғрисидаги ҳисоботлари ва Қонун ва уставга мувофиқ бошқа ҳужжатлари кўриб чиқилади.

10.3. Акциядорларнинг йиллик умумий йиғилишидан ташқари ўтказиладиган умумий йиғилишлари навбатдан ташқари йиғилишлар ҳисобланади.

10.4. Акциядорлар умумий йиғилишининг ваколат доирасига қуйидагилар киради:

жамият уставига ўзгартиш ва қўшимчалар киритиш ёки жамиятнинг янги таҳрирдаги уставини тасдиқлаш;

жамиятни қайта ташкил этиш;

жамиятни тугатиш, тугатувчини (тугатиш комиссиясини) тайинлаш ҳамда оралик ва якуний тугатиш балансларини тасдиқлаш;

жамият кузатув кенгашининг сон таркибини белгилаш, уларнинг аъзоларини сайлаш ва аъзоларнинг ваколатларини муддатидан илгари тугатиш;

эълон қилинган акцияларнинг энг кўп миқдорини белгилаш;

устав фондиди кўпайтириш ва жамият уставига ўзгартириш ва қўшимчалар киритиш тўғрисидаги масалаларни ҳал қилиш;

қонунчиликда белгиланган тартибда акцияларни жойлаштириш (қимматли қоғозларнинг биржа бозорига ва уюшган биржадан ташқари бозорига чиқариш) нархини белгилаш;

жамиятнинг устав капиталини камайтириш;

ўз акцияларини олиш;

жамиятнинг ташкилий тузилмасини тасдиқлаш, ижроия органини тузиш, унинг раҳбарини сайлаш (тайинлаш) ва раҳбарнинг ваколатларини муддатидан илгари тугатиш;

жамият тафтиш комиссиясининг аъзоларини сайлаш ва уларнинг ваколатларини муддатидан илгари тугатиш, шунингдек тафтиш комиссияси тўғрисидаги низомни тасдиқлаш;

жамиятнинг йиллик ҳисоботини, шунингдек жамият фаолиятининг асосий йўналишлари ва мақсадидан келиб чиққан ҳолда жамиятни ўрта муддатга ва узоқ муддатга ривожлантиришнинг аниқ муддатлари белгиланган стратегиясини тасдиқлаш;

жамиятнинг фойдаси ва зарарларини тақсимлаш;

жамият кузатув кенгашининг ва тафтиш комиссиясининг ўз ваколат доирасига кирадиган масалалар юзасидан, шу жумладан жамиятни бошқаришга доир қонун ҳужжатларида белгиланган талабларга риоя этилиши юзасидан жамият кузатув кенгашининг ҳисоботларини ва тафтиш комиссиясининг ҳулосаларини эшитиш;

акциядорлар умумий йиғилишининг регламентини тасдиқлаш;

акцияларни майдалаш ва йириклаштириш;

жамиятнинг кузатув кенгаши аъзоларига, тафтиш комиссияси аъзоларига тўланадиган ҳақ ва (ёки) компенсацияларни белгилаш;

қонунчиликда белгиланган ҳолларда жамият томонидан йирик битимлар ва жамият аффилиланган шахслари билан битимлар тузиш тўғрисида қарор қабул қилиш;

жамиятнинг “Ички назорати тўғрисида”, “Дивиденд сиёсати тўғрисида”, “Манфаатлар тўқнашуви бўйича амалга ошириладиган тадбирлар тартиби тўғрисида”ги Низомларини тасдиқлаш;

жамиятнинг коррупцияга қарши курашиш ва комплаенс сиёсатларини тасдиқлаш;

мажбурий аудиторлик текширувини ўтказиш учун аудиторлик ташкилотини белгилаш, ушбу ташкилотнинг хизматларига тўланадиган энг кўп ҳақ миқдори ва у билан шартнома тузиш (шартномани бекор қилиш) тўғрисида қарор қабул қилиш;

жамиятнинг қундалик хўжалик фаолиятига кирувчи битимларни белгилаш;

Акциядорларнинг умумий йиғилиши қонун ҳужжатларига мувофиқ бошқа масалалар бўйича қарорлар қабул қилиши мумкин.

10.5. Акциядорлар умумий йиғилишининг ваколат доирасига киритилган масалалар жамият кузатув кенгашига ҳал қилиши учун берилиши мумкин эмас, қонун ҳужжатларида ва ушбу уставда кўзда тутилган ҳоллар бундан мустасно.

10.6. Акциядорларнинг умумий йиғилишини ташкил қилиш ва олиб бориш, акциядорлар умумий йиғилиши томонидан қарор қабул қилиш тартиби жамиятнинг акциядорлар умумий йиғилиши қарори билан тасдиқланган “Акциядорлар умумий йиғилиши тўғрисида”ги Низомда белгилаб қўйилади.

10.7. Жамиятнинг барча оддий акциялар битта акциядорга тегишли бўлса, жамиятда акциядорларнинг умумий йиғилиши ўтказилмайди. Юқорида қайд этилган масалалар бўйича қарорлар бундай акциядор томонидан яқка тартибда қабул қилинади ҳамда ёзма шаклда расмийлаштирилади.

## **XI. ЖАМИЯТ КУЗАТУВ КЕНГАШИ**

11.1.Жамият кузатув кенгаши жамият фаолиятига умумий раҳбарликни ва стратегик бошқарувни амалга оширади, қонун ҳужжатлари ва ушбу устав билан акциядорларнинг умумий йиғилиши ваколат доирасига киритилган масалаларни ҳал этиш бундан мустасно.

Жамият кузатув кенгаши қонун ҳужжатларига, ушбу уставга ва акциядорларнинг умумий йиғилиши томонидан тасдиқланган “Кузатув кенгаши тўғрисида”ги низомга мувофиқ иш юритади.

11.2.Жамият кузатув кенгаши аъзоларининг сони 5 (беш) кишидан иборат.

11.3.Жамият кузатув кенгашининг ваколатларига қуйидагилар киради:

жамиятни ривожлантириш стратегиясига эришиш бўйича кўрилаётган чора-тадбирлар тўғрисида жамият ижроия органининг ҳисоботини мунтазам равишда эшитиб борган ҳолда жамият фаолиятининг устувор йўналишларини белгилаш;

жамият бошқарув аъзоларини сайлаш (тайинлаш) ва уларнинг ваколатларини муддатидан илгари тугатиш;

акциядорларнинг йиллик ва навбатдан ташқари умумий йиғилишларини чақириш, қонунчиликда назарда тутилган ҳоллар мустасно;

акциядорлар умумий йиғилишининг кун тартибини тайёрлаш;

акциядорларнинг умумий йиғилиши ўтказиладиган сана, вақт ва жойни белгилаш;

акциядорларнинг умумий йиғилиши ўтказилиши ҳақида хабар қилиш учун ҳамда умумий йиғилишга қатнашиш ҳуқуқига эга бўлган жамият акциядорларининг реестрини шакллантириш санасини белгилаш;

жамият уставига ўзгартиш ва қўшимчалар киритиш ёки жамиятнинг янги таҳрирдаги уставини тасдиқлаш масалаларини акциядорларнинг умумий йиғилиши ҳал қилиши учун киритиш, қонун ҳужжатларида назарда тутилган ҳоллар бундан мустасно;

жамиятнинг ижроия органига тўланадиган ҳақ ва компенсациялар миқдорларини белгилаш, шунингдек, кўрсатилган тўловларнинг чегараси миқдорини самарадорликнинг муҳим кўрсаткичларидан келиб чиқиб белгилаш;

мол-мулкнинг бозор қийматини белгилашни ташкил этиш;

жамиятнинг йиллик бизнес-режасини тасдиқлаш, бунда жамиятнинг келгуси йилга мўлжалланган бизнес-режаси жамият кузатув кенгаши мажлисида жорий йилнинг 1 декабридан кечиктирмай тасдиқланиши лозим;

ички аудит хизматини ташкил этиш ва унинг ходимларини тайинлаш, шунингдек ҳар чоракда унинг ҳисоботларини эшитиб бориш;

жамият ижроия органининг фаолиятига дахлдор ҳар қандай ҳужжатлардан эркин фойдаланиш ва жамият кузатув кенгаши зиммасига юклатилган вазифаларни бажариш учун бу ҳужжатларни ижроия органидан олиш. Жамият кузатув кенгаши ва унинг аъзолари олинган ҳужжатлардан фақат хизмат мақсадларида фойдаланиши мумкин;

аудиторлик текширувини ўтказиш (мажбурий аудиторлик текшируви бундан мустасно), аудиторлик ташкилотини белгилаш, унинг хизматларига тўланадиган энг қўп ҳақ миқдори ва у билан шартнома тузиш (шартномани бекор қилиш) тўғрисида қарор қабул қилиш;

жамиятнинг тафтиш комиссияси аъзоларига тўланадиган ҳақ ва компенсацияларнинг миқдорлари юзасидан тавсиялар бериш;

дивиденд миқдори, уни тўлаш шакли ва тартиби юзасидан тавсиялар бериш;

жамиятнинг захира фондидан ва бошқа фондларидан фойдаланиш;

жамиятнинг филиалларини ташкил этиш ва ваколатхоналарини очиш;  
жамиятнинг шўъба ва тобе хўжалик жамиятларини ташкил этиш;  
жамият томонидан корпоратив облигациялар чиқариш тўғрисида қарор қабул қилиш;  
қимматли қоғозларнинг ҳосилаларини чиқариш тўғрисида қарор қабул қилиш;  
жамиятнинг корпоратив облигацияларини қайтариб сотиб олиш тўғрисида қарор қабул қилиш;

қимматли қоғозлар чиқарилиши тўғрисида қарорни ва эмиссия рисоласини тасдиқлаш;

аввал рўйхатдан ўтказилган қимматли қоғозлар чиқарилишларига ўзгартириш ва (ёки) қўшимчалар киритиш ва тегишли ўзгартириш ва қўшимчалар матнини тасдиқлаш;

кузатув кенгашининг тегишли масалалар бўйича кўмиталар (ишчи гуруҳлар)ни тузиш;

акциядорлар умумий йиғилиши томонидан ва қонунчиликда ўрнатилган миқдор доирасида ҳайрия (хомийлик) ёки беғараз ёрдамни кўрсатиш (олиш) шартлари ва тартибини белгилаш шунингдек ушбу тўғрисида қарорлар қабул қилиш;

қонунчиликда ва ушбу уставда кўзда тутилган ҳолларда жамият томонидан йирик битимлар ва жамият аффилиланган шахслари билан битимлар тузиш тўғрисида қарор қабул қилиш;

жамиятнинг тижорат ва нотижорат ташкилотлардаги иштироки билан боғлиқ битимларни қонун ҳужжатларида ва ушбу уставда белгиланган тартибда тузиш.

жамиятнинг молия-хўжалик фаолиятини назоратини ва самарали бошқаришни амалга ошириш шакллариини белгилаш, бундай назоратни амалга ошириш ва зарур бўлган тақдирда ваколатли бошқарув органларига нисбатан керакли чораларни кўриш;

жамиятнинг мол-мулкига ва фаолиятига нисбатан давлат-хусусий ҳамкорлиги доирасида ҳамкорлик шартномалари, ишончли бошқарув ва бошқа шартномалар тузишни маъқуллаш, Ўзбекистон Республикасининг қонун ҳужжатларига мувофиқ бундай масалалар акциядорларнинг умумий йиғилиши ваколатларига киритилган ҳолатлар бундан мустасно.

Жамият кузатув кенгаши ваколат доирасига қонун ҳужжатларига, ушбу уставга ва акциядорларнинг умумий йиғилиши томонидан тасдиқланган “Кузатув кенгаши тўғрисида”ги низомга мувофиқ бошқа масалаларни ҳал этиш ҳам киритилиши мумкин.

Жамият кузатув кенгашининг ваколат доирасига киритилган масалалар ҳал қилиш учун жамият ижроия органига ўтказилиши мумкин эмас.

11.4. Жамият кузатув кенгаши жамият ижроия органи раҳбарининг (бошқарув раиси) ва ижроия органининг аъзоларини ваколатларини агар улар жамият уставини қўпол тарзда бузса ёки уларнинг ҳаракатлари (ҳаракатсизлиги) туфайли жамиятга зарар етказилган бўлса, муддатидан илгари тугатиш ҳуқуқига эга.

11.5. Жамият кузатув кенгашининг аъзолари қонун ҳужжатларида ва жамият уставида назарда тутилган тартибда акциядорларнинг умумий йиғилиши томонидан бир йил муддатга сайланади.

Жамият кузатув кенгаши таркибига сайланган шахслар чекланмаган тарзда қайта сайланиши мумкин.

Жамият бошқарув аъзолари жамият кузатув кенгашига сайланиши мумкин эмас.

Жамиятда меҳнат шартномаси (контракт) бўйича ишлаётган шахслар жамият кузатув кенгаши аъзоси бўлиши мумкин эмас.

Жамият кузатув кенгаши таркибига сайланадиган шахсларга нисбатан қўйиладиган талаблар акциядорларнинг умумий йиғилиши томонидан тасдиқланадиган “Кузатув кенгаши тўғрисида”ги низомда белгилаб қўйилади.

Кузатув кенгаши таркибига Агентлик директори киритилган ҳолда, унинг таркиби камида 50 фоиз аъзолари юқори малакали, халқаро тажрибага эга бўлган мутахассислардан иборат бўлади.

11.6. Жамият кузатув кенгаши аъзолари сайлови кумулятив овоз бериш орқали амалга оширилади.

11.7. Жамият кузатув кенгашининг раиси кузатув кенгаши аъзоларининг умумий сонига нисбатан кўпчилик овоз билан, ушбу кенгаш таркибидан кузатув кенгаши аъзолари томонидан сайланади.

Жамият кузатув кенгаши ўз раисини кузатув кенгаши аъзоларининг умумий сонига нисбатан кўпчилик овоз билан қайта сайлашга ҳақли.

Жамият кузатув кенгашининг раиси унинг ишини ташкил этади, кузатув кенгаши мажлисларини чақиради ва уларда раислик қилади, мажлисларда баённома юритилишини ташкил этади, акциядорларнинг умумий йиғилишида раислик қилади.

Жамият кузатув кенгашининг раиси бўлмаган тақдирда унинг вазифасини кузатув кенгашининг аъзоларидан бири амалга оширади.

11.8. Жамият кузатув кенгашининг мажлиси кузатув кенгашининг раиси томонидан унинг ўз ташаббусига кўра, жамият кузатув кенгаши аъзоси, тафтиш комиссияси, бошқарув аъзосининг ҳамда жамиятнинг акцияларнинг ҳаммаси бўлиб камида бир фоизига эгалик қилувчи акциядор талабига кўра чақирилади.

Жамият кузатув кенгашининг мажлисини ўтказиш учун жамият кузатув кенгашига сайланган аъзоларнинг етмиш беш фоизидан кам бўлмаслиги керак.

Жамият кузатув кенгаши аъзоларининг сони жамият уставда назарда тутилган миқдорнинг етмиш беш фоизидан кам бўлган тақдирда, жамият кузатув кенгашининг янги таркибини сайлаш учун акциядорларнинг навбатдан ташқари умумий йиғилишини чақириши шарт. Кузатув кенгашининг қолган аъзолари акциядорларнинг бундай навбатдан ташқари умумий йиғилишини чақириш тўғрисида қарор қабул қилишга, шунингдек жамият бошқарув раисининг ваколатлари муддатидан илгари тугатилган тақдирда, унинг вазифасини вақтинча бажарувчини тайинлашга ҳақлидир.

11.9. Жамият кузатув кенгашининг мажлиси чоракда камида бир марта ўтказилади.

11.10. Жамият кузатув кенгашининг мажлисида қарорлар, агар қонун ҳужжатларида ўзгача қоида назарда тутилмаган бўлса, мажлисда ҳозир бўлганларнинг кўпчилик овози билан қабул қилинади.

Қуйидаги масалалар бўйича қарор жамият кузатув кенгаши томонидан бир овоздан қабул қилинади:

жамият томонидан акцияларга айирбошланадиган корпоратив облигацияларни чиқариш;

жамият томонидан йирик битимлар тузиш;

жамият томонидан аффилиланган шахслар билан битимлар тузиш.

11.11. Жамият кузатув кенгаши мажлисида масалалар ҳал этилаётганда кузатув кенгашининг ҳар бир аъзоси битта овозга эга.

Жамият кузатув кенгашининг бир аъзоси ўз овозини кузатув кенгашининг бошқа аъзосига беришига йўл қўйилмайди.

Жамият кузатув кенгаши аъзоларининг овозлари тенг бўлган тақдирда кузатув кенгаши томонидан қарор қабул қилишда жамият кузатув кенгаши раисининг овози ҳал қилувчи овоз ҳисобланади.

11.12. Жамият кузатув кенгашининг қарорлари сиртдан овоз бериш йўли билан (сўров йўли билан) жамият кузатув кенгашининг барча аъзолари томонидан бир овоздан қабул қилиниши мумкин.

11.13. Жамият кузатув кенгашининг мажлисида баённома юритилади. Кузатув кенгашининг баённомаси мажлис ўтказилганидан сўнг 10 кундан кечиктирмай тузилади. Мажлис баённомасида қуйидагилар кўрсатилади:

мажлис ўтказилган сана, вақт ва жой;

мажлисда ҳозир бўлган шахслар;

мажлиснинг кун тартиби;

овоз беришга қўйилган масалалар, улар юзасидан ўтказилган овоз бериш яқунлари;

қабул қилинган қарорлар.

Жамият кузатув кенгаши мажлисининг баённомаси мажлисда иштирок этаётган жамият кузатув кенгаши аъзолари томонидан имзоланади, улар мажлиснинг баённомаси тўғри расмийлаштирилиши учун жавобгар бўлади.

11.14. Жамият кузатув кенгаши мажлисининг баённомаси имзоланган куни жамиятнинг ижроия органига (бошқарувга) ижро этиш учун топширилади. Кузатув кенгаши акциядорларнинг умумий йиғилишини чақириш тўғрисида қарор қабул қилган тақдирда, мазкур қарор ҳақидаги ахборот ижроия органига кузатув кенгашининг мажлиси ўтказиладиган куни топширилади.

## **XII. ЖАМИЯТНИНГ ИЖРОИЯ ОРГАНИ**

12.1. Жамиятнинг жорий фаолияти устидан раҳбарлик коллегиял ижроия органи (бошқарув) томонидан амалга оширилади. Жамият бошқаруви 3 (уч) кишидан иборатдир. Бошқарув ишига бошқарув раиси раҳбарлик қилади.

Кузатув кенгашининг қарорига асосан бошқарув раиси ва аъзоларини тайинлаш, чет эллик мутахассислар иштирок этиши имконияти бўлган танлов бўйича саралаш асосида амалга оширилиши мумкин.

12.2. Бошқарувнинг ваколатларига жамиятнинг барқарор фаолиятини таъминлаш ва қийматини ошириш бўйича барча чораларни кўриш, шунингдек жорий фаолиятига раҳбарлик қилишга доир барча масалалар қиради, акциядорлар умумий йиғилиши ёки кузатув кенгашининг ваколатларига киритилган масалалар бундан мустасно.

12.3. Жамият бошқарув раиси жамиятнинг кундалик фаолиятига раҳбарликни амалга оширади, жамият номидан ишончномасиз иш юритади, шу жумладан унинг манфаатларини ифодалайди ва давлат муассасаларида, мулкчиликнинг турли шаклидаги корхона ва ташкилотларда жамият ҳуқуқларини ҳимоя қилади.

12.4. Жамият кузатув кенгаши бошқарув раиси ва бошқарув аъзолари билан тузилган шартномани, агар улар жамият устави қоидаларини қўпол тарзда бузса ёки уларнинг ҳаракатлари (ҳаракатсизлиги) туфайли жамиятга зарар етказилган бўлса, муддатидан илгари тугатиш (бекор қилиш) ҳуқуқига эга.

12.5. Бошқарув раиси ва аъзоларига тўланадиган ҳақ ва компенсациялар миқдорлари самарадорликнинг муҳим кўрсаткичларидан келиб чиққан ҳолда белгиланади.

### **XIII. ЖАМИЯТ КУЗАТУВ КЕНГАШИ АЪЗОЛАРИНИНГ, БОШҚАРУВ РАИСИНИНГ ВА БОШҚАРУВ АЪЗОЛАРИНИНГ ЖАВОБГАРЛИГИ**

13.1. Жамиятга зарар етказилишига сабаб бўлган қарорга овоз беришда иштирок этмаган ёки ушбу қарорга қарши овоз берган жамият кузатув кенгаши аъзолари, бошқарув раиси ва бошқарув аъзолари жавобгар бўлмайди, конунчиликда белгиланган ҳоллар бундан мустасно.

13.3. Жамият ёки у жойлаштирган акцияларнинг ҳаммаси бўлиб камида бир фоизига эгалик қилувчи акциядор (акциядорлар) жамиятга етказилган зарарларнинг ўрнини қоплаш тўғрисидаги даъво билан жамият кузатув кенгаши аъзоси, бошқарув раиси ёки бошқарув аъзоси устидан судга мурожаат қилишга ҳақли.

### **XIV. ЖАМИЯТНИНГ МОЛИЯ-ХЎЖАЛИК ФАОЛИЯТИНИ НАЗОРАТ ҚИЛИШ**

#### **а) Тафтиш комиссияси**

14.1. Жамиятнинг молия-хўжалик фаолиятини назорат қилиш учун акциядорларнинг умумий йиғилиши томонидан 1 йил муддатга тафтиш комиссияси сайланади.

Айни бир шахс айни бир жамиятнинг тафтиш комиссияси таркибига (тафтишчиликка) кетма-кет уч мартадан ортиқ сайланиши мумкин эмас. Тафтиш комиссиясининг аъзолари кузатув кенгашининг аъзоси бўлиши мумкин эмас ва ёки жамиятда меҳнат шартномаси бўйича ишлаши мумкин эмас.

14.2. Жамият тафтиш комиссияси 3 (уч) кишидан иборат.

14.3. Жамият тафтиш комиссиясининг ваколати:

бир йиллик давр ичидаги фаолият якунлари бўйича жамиятнинг молия-хўжалик фаолиятини текшириш ва тегишли хулосасини акциядорларнинг йиллик Умумий йиғилишига олиб чиқиш;

бошқа давр ичидаги фаолият якунлари бўйича жамиятнинг молия-хўжалик фаолиятини текшириш;

жамиятнинг молия-хўжалик фаолиятини текшириш якунларига кўра хулоса тузиш;

жамиятда аффилланган шахслар билан тузилган битимлар ёки йирик битимлар мавжудлиги, шунингдек конун ҳужжатларининг ва жамият ички ҳужжатларининг бундай битимларни тузишга доир талабларига риоя қилиниши тўғрисидаги хулосани тайёрлаш;

ташқи аудиторлар ва ички аудит хизмати билан учрашувларни ўтказиш, уларнинг иш жараёни ҳақида ва ички назорат, молиявий ҳисобот ва бошқа муҳим масалалар бўйича ахборотларни ва хулосаларини эшитиш;

жамиятда аффилланган шахслар билан тузилган битимлар ёки йирик битимлар мавжудлиги, шунингдек конун ҳужжатларининг ва жамият ички ҳужжатларининг бундай битимларни тузишга доир талабларига риоя қилиниши тўғрисидаги хулосани ҳар чоракда жамият кузатув кенгашининг мажлисига ва акциядорларнинг йиллик умумий йиғилишига олиб чиқиш.

14.4. Жамиятнинг молия-хўжалик фаолиятини текшириш якунларига кўра жамиятнинг тафтиш комиссияси хулоса тузади, бу хулосада:

жамиятнинг ҳисоботларида ва бошқа молиявий ҳужжатларида кўрсатилган маълумотларнинг ишончлилигига доир баҳо;



бухгалтерия ҳисобини юритиш ва молиявий ҳисоботни тақдим этиш тартиби бузилганлиги, шунингдек молия-хўжалик фаолияти амалга оширилаётганда қонун ҳужжатлари бузилганлиги фактлари тўғрисидаги ахборот кўрсатилиши шарт.

тафтиш комиссиясининг хулосаси жамият акциядорларининг Умумий йиғилишида эшитилади.

14.5. Жамият тафтиш комиссияси аъзоларига қўйиладиган малака талаблари ва тафтиш комиссиясининг фаолият кўрсатиш тартиби акциядорларнинг умумий йиғилиши томонидан тасдикланадиган «Жамият тафтиш комиссияси тўғрисида»ги низомда белгиланади.

#### **б) Ички аудит хизмати**

14.6. Жамият активларининг баланс қиймати энг кам иш ҳақи миқдорининг юз минг баробаридан кўп бўлган тақдирда жамиятда ички аудит хизмати ташкил этилади. Ички аудит хизмати жамиятнинг кузатув кенгашига ҳисобдордир.

14.7. Жамиятнинг ички аудит хизмати қўйидагиларни текшириш ҳамда баҳолаш орқали жамият бошқаруви, филиаллари ва ваколатхоналари ишини назорат қилади:

жамиятнинг бошқаруви раиси, филиаллари ва ваколатхоналари томонидан қонун ҳужжатларига, жамият уставига ва бошқа ҳужжатларга риоя этилишини;

жамиятнинг бухгалтерия ҳисобида ва молиявий ҳисоботларда маълумотларнинг тўлиқ ҳамда ишончли тарзда акс эттирилиши таъминланишини;

жамиятнинг хўжалик операцияларини амалга оширишнинг белгиланган қоидалари ва тартиб-таомилларига риоя этилишини;

жамият активларининг сақланишини, устав капиталидаги 50 фоиз улуш жамиятга тегишли бўлган юридик шахслар билан ўтказилган операцияларни, шунингдек жамиятни бошқариш юзасидан қонун ҳужжатларида белгиланган талабларга риоя этилишини.

14.8. Ички аудит хизматининг ходимлари сўнгги ўн йил ичида камида икки йил давомида бухгалтерия ҳисоби, аудит, молиявий ёки солиқ назорати соҳасида амалий тажрибага эга бўлишлари ва қўйидаги талаблардан бирига жавоб беришлари керак:

Ички аудиторлик сертификатига эга бўлиш;

Ўзбекистон Республикасининг олий таълим муассасаларида ёки Ўзбекистон Республикаси қонун ҳужжатларига мувофиқ, Ўзбекистон Республикасидаги таълимга тенглиги эътироф этилган хорижий давлат таълим муассасасида олинган олий иқтисодий маълумотга эга бўлиш.

14.9. Жамиятнинг ички аудит хизмати ўз фаолиятини қонун ҳужжатларида, ушбу устав ва акциядорларнинг умумий йиғилиши томонидан тасдикланадиган «Жамият ички аудит хизмати тўғрисида»ги низомда белгиланадиган тартибга мувофиқ амалга оширади.

#### **в) Аудиторлик ташкилоти (ташқи аудитор)**

14.10. Аудиторлик ташкилоти жамият билан тузилган шартномага мувофиқ қонун ҳужжатларида белгиланган тартибда жамиятнинг молия-хўжалик фаолиятининг текширилишини амалга оширади ва унга аудиторлик хулосаси тақдим этади.

14.11. Аудиторлик ташкилоти жамиятнинг молиявий ҳисоботи ва молияга доир бошқа ахборот ҳақида нотўғри хулосани ўз ичига олган аудиторлик хулосаси тузилганлиги оқибатида етказилган зарар учун жамият олдида жавобгар бўлади.

#### **г) Жамиятнинг корпоратив маслаҳатчиси**

14.12. Кузатув кенгаши қарорига асосан жамиятда корпоратив маслаҳатчиси лавозими жорий этилиши мумкин. Корпоратив маслаҳатчи кузатув кенгашига ҳисобдор бўлади ва жамиятда корпоратив қонун ҳужжатларига риоя этилиши устидан назорат қилиш вазифасини бажаради.

14.13. Жамият корпоратив маслаҳатчиси ўз фаолиятини кузатув кенгаши томонидан тасдиқланган “Корпоратив маслаҳатчи тўғрисида”ни низом асосида амалга оширади.

#### **е) Комплаэнс хизмати**

14.14. Кузатув кенгаши қарори билан жамиятда жамиятнинг таркибий тузилмаси ҳисобланадиган ва жамият томонидан коррупцияга қарши курашиш соҳасидаги қонунчилик талабларига риоя қилинишига жавобгар бўлган Комплаэнс хизмати тузилиши мумкин.

14.15. Комплаэнс хизмати кузатув кенгаши томонидан тасдиқланган низом асосида иш юритади ва кузатув кенгашига ҳисобот беради. Комплаэнс хизмати кузатув кенгаши ва бошқарув раиси олдида ҳисобдордир.

14.16. Комплаэнс хизмати жамиятнинг ва унинг таркибий бўлимларини, шу жумладан ички аудит хизмати фаолиятини мониторинг қилиш ва баҳолаш ҳуқуқига эга.

### **XV. ЖАМИЯТНИНГ ЙИЛЛИК ҲИСОБОТЛАРИНИ ТУЗИШ, ТЕКШИРИШ ВА ТАСДИҚЛАШ ТАРТИБИ**

15.1. Жамият қонун ҳужжатларида белгиланган тартибда бухгалтерия ҳисобини юритиши ва молиявий ҳисобот тақдим этиши шарт.

Жамиятда бухгалтерия ҳисобининг ташкил этилиши, ҳолати ва ишончлилиги, тегишли органларга ҳар йилги ҳисобот ва бошқа молиявий ҳисоботлар, шунингдек жамиятнинг расмий веб-сайтида ва оммавий ахборот воситаларида акциядорларга, кредиторларга тақдим этиладиган жамият фаолияти тўғрисидаги маълумотлар ўз вақтида тақдим этилиши учун жавобгарлик жамият бошқаруви раисининг зиммасида бўлади.

15.2. Жамиятнинг молиявий ҳисоботида кўрсатилган ва акциядорларнинг умумий йиғилишига тақдим этиладиган йиллик ҳисоботдаги, бухгалтерия балансидаги, фойда ва зарарлар ҳисобварағидаги маълумотларнинг ишончлилиги мулкӣ манфаатлари жамият ёки унинг акциядорлари билан боғлиқ бўлмаган аудиторлик ташкилоти томонидан тасдиқланган бўлиши керак.

Жамият Халқаро молиявий ҳисобот стандартларига мувофиқ тузилган йиллик молиявий ҳисоботни у Халқаро аудит стандартларига мувофиқ ташқи аудитдан ўтказилганидан кейин, акциядорларнинг йиллик умумий йиғилиши ўтказиладиган санадан камида икки ҳафта олдин эълон қилади.

15.3. Жамиятнинг йиллик ҳисоботи акциядорларнинг йиллик умумий йиғилиши ўтказиладиган санадан ўн кундан кечиктирмай жамиятнинг кузатув кенгаши томонидан дастлабки тарзда тасдиқланиши лозим.

15.4. Жамиятнинг молия йили 1 январдан бошланади ва 31 декабрда тугайди.

### **XVI. ЖАМИЯТНИ ҚАЙТА ТАШКИЛ ЭТИШ ВА ТУГАТИШ**

16.1. Жамиятни қайта ташкил этиш ва тугатиш қонун ҳужжатларида белгиланган тартибда амалга оширилади.

### **XVII. ЯКУНИЙ ҚОИДАЛАР**

17.1. Ушбу уставнинг ҳолатлари бўйича келиб чиқадиган барча низо ва келишмовчиликлар музокаралар йўли билан ҳал қилинади. Низо ва келишмовчиликларни музокаралар йўли билан ҳал қилиш имконияти бўлмаган тақдирда, улар тегишли равишда суд тартибида ҳал қилинади.

17.2. Ушбу уставда акс эттирилмаган масалалар Ўзбекистон Республикасининг “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонуни ва бошқа меъёрий-ҳуқуқий ҳужжатлар билан тартибга солинади.

17.3. Қимматли қоғозлар бозори соҳасидаги қонун ҳужжатларига ушбу уставнинг ҳолатларига зид келувчи ўзгартиришлар киритилган ҳолларда, амалдаги қонун ҳужжатлари меъёрлари қўлланилади.

17.4. Ушбу устав Ўзбекистон Республикасининг қонун ҳужжатларида белгиланган тартибда давлат рўйхатига олинган вақтдан бошлаб кучга киради.